

MEMBUKAKAN KEINDAHAN ISLAM

(Dipetik dan diMelayukan oleh Za‘ba)

Banyak malamnya yang aku telah menangis
kerana manusia: teresak, terdesak!

Harapku: Moga-moga dapat kucarikan
tudung kesulitan hidup yang berlapis-lapis.

Semoga dapatku tarik bawa keluar
rahsia pertubuhan hidup, masin dan tawar,
dari tempat membancuh ramu kejadian,
untuk menjadi ubat pemulih, penawar.

Semoga dapat kuterangi kegelapan alam
seperti bulan memberi kecantikan malam:
Aku hanya sebagai debu di tapak kasut,
menghambakan diriku di tapak kaki Islam.

Islam yang telah masyhur agama kebilangan
di gunung di ganang di dunia di kayangan:
Agama yang telah manyalakan dalam hati manusia
api nyanyian yang tak padam-padam berpanjangan.

Agama yang telah menyemaikan sehalus atom
kemudian menuai matahari berkuntum;

Agama yang telah mengeluarkan beribu pujangga
seperti ‘Attār dan Rūmī, bernama harum.

Aku hanya suatu bunyi angin mengeluh,
tetapi aku akan naik kelangit yang tujuh:
Aku hanya suatu hembusan nafas,
tetapi asal terbitku dari api penyuluhan.

Kalamku terdorong oleh fikiran tinggi,
lalu melancar ke hadapan menyorong pergi:
Dilemparkannya merata-rata rahsia sulit,
dari bau tudung yang baharuku buka lagi

Rahsia tiap-tiap setitik air dikira,
boleh jadi sama dengan laut segera.
Dan tiap-tiap sehalus pasir di padang,
boleh meluas jadi padang sahara.

- (Iqbāl dalam “Rahsia diri”)